

## Vēdoržēimis

Vakar spīriau lakštingalā tēise i snapa  
Ēr jouda maliava ēštepliuojau balta varna.  
Ruopštiaus par kētū galvas link vēršūnēs,  
I apatē nospērdamas gerašērdius lebedas.

Vakar, klausīdamuos Štrausa valsa,  
Skubiejau bešuokont tau pakēštē kuojē...  
Kumet valuojēs pakrētēs ont parketa,  
Joukiaus, kad nieks nepaded atsēkeltē.

Vakar bovau kap apibuovīts vaks laimings,  
Nes tava nauji truoba degē lēipsna atvēra.  
Šuokau pelkie, gomēnēs batās apsēavēs,  
Žēnuodams, kad doubkasē tau guoli ruoš.

Vakar ēš saldiuos laimēs šērdēs alpiejē,  
Kap alpie nogara masažistēs ēškasīta...  
Tikiejau, kad eso baisē didilis ē galings,  
Tad stūmīau kētus kou tuolīau nu savēs.

Šēndēin staigē, nepasēsakiusi ēš onksta,  
Pu kuojuom garsē sotratiejē žēmēs ašēs.  
Vuo ont pakaušē ožtēška žvērblē šūds.  
Pajotau, kap pradedo keistēis i gerojē posē.